



橋仔

愛去坑肚个路項，一定愛先過一板橋仔，大家喊佢「線橋」，現下係砸固固仔个紅毛泥橋，行起來盡穩也盡安心，企在頂高做得看底下鮮鮮个河壩水，來散步个人也輒常停在該位，打一下嘴鼓，食一下茶，車仔不時在臂項過上過下，出出入入个坑肚人，下下就愛倚恃佢。

在吾印象裡肚，線橋係吊橋，橋面探枋仔，兩片係用鋼索固定，毋過縫仔當大，行過去會緊搖，腳底就會撓撓，歸身仔緊起雞麻皮。伙房項个細人仔盡好弛崗打陣湊等去線橋搞，行到半中央仔，上屋个阿文正煞猛牯颯，下屋个阿忠又盡命牯搖，橋仔就開始晃來晃去，較細个細亞仔斯驚到蛇聲鬼噉，坐在橋中央，毋敢停毋敢動，企也毋核，行也毋得，等到大姊來咄人，佢兜正放停。講又罔講，該兜細猴仔斯又驚又好，嚇到會死又好珍。

漸漸仔，枋仔歿忒了，橋面一空空仔，越爛越大空，吊橋个索仔乜有必忒个現象，毋單淨與多拜騎毋過去，連人行就當危險，歇在坑肚个謝屋、何屋人，下下愛迂一大圈，翻山過嶺正做得出門，拖來扯去愛花加半點零鐘較久，正經係燒氣發冷氣，毋知愛仰結煞正好，好得後來爭取著經費，正起過這條新橋，換來現下个平安順序。

河壩底還有一條水底橋，佢試著當奇怪，水底个橋愛仰仔行？聽老輩人講，做水底橋係考慮著成本个问题，頭擺个紅毛泥貴參參仔，技術又毋罈好，做大橋斯係大工程，愛費大精神規畫。顛倒做水底橋貼等河壩底，濂水該下，人同車仔做得行過，做大水時，水又做得從面頂高湧過，毋驚分大水滂忒，恁樣過河壩就加異利便。毋過，識有人發大水行水底橋，噯分水打走，實在乜係六月日頭，後哀拳頭——得人畏。

上截河壩無車仔行，只有竹園林一家人愛過河壩去耕種，厝屋前屋背種當多竹仔，故所阿林伯會倒竹仔來採橋，苗理竹个皮韌又硬、篾瓢又賁，適合來做橋身；笏竹耐燥耐水，做橋榦較安全。佢一家人大大細細，共下擎竹仔去河壩臂，阿爸修竹仔、阿公破篾仔，一晝邊就做好一板竹橋仔，揸番薯、揸肥料做得行橋仔，免得行生溜苔个石跳仔，毋堵好還會打孔翹。佢同細人伴乜長透去行竹橋仔，躡在橋仔項有彈性，略略仔會摠，無就坐在橋面項，兩隻腳放在河壩浸水打水花，水聲笑聲毋識停過。

現下个橋仔毋單淨有交通个功能，還結合在地个文化特色，山林風光，變成最時髦个打卡所在，最接近大自然个行寮方式，行在橋頂就係有一種像鳥仔飛个感覺，自由自在盡快樂。

作者：黃美貞

☆詞彙學習☆

【砸固固仔】zab` gu gu e`：穩固有力。

【歿忒】mud` ted`：木頭腐爛。

【弛崗打陣】ie` gong` da` ciin：形容人潮接連不斷，或是成群結隊的樣子。

【順序】sun xi：順利。

【濂水】liam` sui`：水位降低。

【蛇聲鬼噉】sa` sang` gui` gieu：發出怪叫的聲音。

【石跳仔】sag tiau e`：鋪在淺水或泥地上，供人踩踏行進的石頭。

【打孔翹】da` kung` kieu：因重量不平衡而使另一頭翹起來。